

24. oktober 2019

**Itilliarsummi ikerasaliortoqarnissaanik Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Stine Egede, Inuit Ataqtigiit)

Siullermik matumanga siunnersuuteqartoq Stine Egede Inuit Ataqtigiinneersoq Siumumiit qutsavigiumavarput Inatsisartut aalajangiiffigisassaattut siunnersuutaanut soqutigintumut saqqummiussaqaarneranut.

Siunnersuutip massumap aallartiffigisaatut taasinnaasarput 2017-imi upernaakkut Inatsisartuni siullermeerlugu sammivarput, taamanilu ikerasaliortoqarnissaa utaqqissunneqarallartut taaneqarsinnaavoq, tassami sinerissuatsinni suliaasannaasut taamaattut annertunerusumik paasisaqarfiginissaat aammalu suliarineqarnissaannut aningaasartuutaasussat sukumiisumik misissuiffigineqarnissaat ujartorneqarmata nalunaarusiortitsinissaq pivoq naammassineqarlunilu.

Nunatta kujataani angalaniarnikkut periarfissatigut ilungersunareeqqisumi, pingaartumik nunatta kujaterpiaa eqqarsaatigalugu, pissutsit ilorraap tungaanut saatsinnissaat ilaatigut Itilliar-suup ikerasaliortifigineratigut pilersissinnaavagut.

Tassami Itilliar-suk sipinneqartuuppat taamaallunilu angallatinut aqutigineqarsinnaangorluni Qaqortumiit kujammut Alluitsup peanut, Nanortalimmut nunaqarfittaannullu angalaniarneq arlalitsigut oqilisarneqartussaavoq, tassami piffissaq sukkanerusoq atorlugu apuuffissamut apuuttoeqarsinnaalissaaq, imartat avataanut ammaannartut uloriarnarnerungaartut aqutigingikkaluarlugit angalasoqarsinnaalissaaq, sikorsuit nalaanni aqutit aqutigiuminaannerpaat ilaat aqutigingikkaluarlugit angalasoqarsinnaalissaaq kiisalu orsussamik annikinnerungaartumik atuilluni angalasoqarsinnaalissagaluartoq Siumumiit qularutigingilarput.

Ukiuni kingullerni ilaatigut sinersortaatsip Nanortalimmut tikitalernissaa innuttaasunit aammalumi qinikkaniit annertuumik kissaataasoq ilisimavarput, taamaammallu siunnersuut manna ilaatigut Qaqortup kujataani najugaqartunut annertuutigut ikorfartuutaasasoq Siumumi qularutigingilarput. Naatsumik oqaatigalugu: Ukiuni nutaanerusuni ikerasaliat siullersaat isumannaatsorlu Itilliar-summi pilersinnissaa piffissanngorpoq. Taamaammat Siumumumiit Itilliar-suup sipinneqarnissaanut suliniutit aningaasartallit piarnerpaamik aningaasaliiffiginissaat piumasaraarput - kingusinnerpaamik 2021-imiit aningaasalerneqartumik.

Ilanngullugu Siumumiit oqaatigerusupparput kiffartuussinissamik isumaqtigiissutit ilaatigut ilungersunartunik atugassaqtitsisartut eqqarsaatigalugit taqqavani ikerasaliornikkut angallannikkut pitsanngoriartitsinissaq aamma aqutissaasasoq upperilluinnaratsigu.



Siumumiit taamatut oqaaseqarluta siunnersuut manna taamatut oqaaseqarfigaarput, Naalackersuisullu allannguutissatut siunnersuutaat taparserparput, taamaaliornikkut ikerasaliornissamut piviusunngortitsinissaq tunngavissarissaartumik suliarineqarnissaa qulakkeersinnaagatsigu. Taamaalilluta ataatsimiititaliamut susassaqartumut ingerlatinneqarnissaa innersuussutigalugitugu.

Anders Olsen, Siumut.